



15  
1301  
8





門 5  
號 1301  
卷 8

唐文拾遺卷之二十一

榮祿大夫三品頂戴前分巡廣東高廉道加四級臣陸心源輯

李林甫

全唐文三百四十五有傳

度支長行旨符奏

租庸丁防和糴春絲稅草諸色旨符每年一造據州

府及諸司計紙當五十萬張仍差百司抄寫事甚勞

煩條目既多詳檢難遍通典緣無定額支稅不常亦

因此涉情兼長姦偽臣今與採訪使及朝集使商量

有不穩便於人非當土所出者隨意沿革務從允便

昭和十年  
二月十四日  
購求



卽人知定準政有常文唐會要作政必有常編成五卷以爲長  
行首冠唐會要作常行旨符省司每年但據應支物數進書頒  
行每州不過一兩紙仍附驛送通典二十三會要五十九

定天下贓估奏

天下定贓估互有高下如山南絹賤河南絹貴賤處  
計贓不至三百卽入死刑貴處至七百已上方至死  
刑卽輕重不侔刑典安寄請天下定贓估絹每匹計  
五百五十價爲限唐會要四十

徐珙

珙洛陽人天寶中進士

唐故使持節上柱國君夫人邱氏墓誌銘

上缺四字壬午元祀季□月六□□故率府郎上柱國□  
君妻邱夫人疾終于洛陽永泰里之私第享年六十  
夫人諱教字教昔先祖仕于宏農遂家於彼本望出  
于河南其長源茂族蓋史牒詳矣曾祖□隋朝議大  
夫□州湖城縣令大父閎皇朝議郎□州司馬烈考  
方皇朝隱于華山高尙其事□積德承慶根□□克  
昌缺三字人□焉夫人□温和之心承柔順之教忠已  
□于□陵□□載缺三字誠□□宗其祭如在事上敬  
謹身□□愛下呂先□□歲宜室宜家六親仰其婦



道母道三德敷聞鳳凰雙飛自得和鳴之樂琴瑟合  
調無忘在御之歡昔字缺三今則見於是矣嗚呼信缺  
字痛君子之先傾□不□□俾我躬之永謝福善之  
應神何食言內則云亡人將安放惟三祀甲申春□  
□月乙□朔廿日甲申葬于河南□□之北原從祔  
禮也長子渙咸安郡良山縣尉次日瞻並樂樂在疚  
□大連喪哀哀色極逾膏柴之毀珙以情因世故義  
叶通家而二子求蒙祖述言不盡意銘而識之銘曰  
盛德之後子孫其昌惟我夫人令淑□彰脩身無忝  
宜家有字缺五今也則亡陟彼岵兮瞻望父陟彼屺缺

字居伊水之東龍門之下泉扃壹閉銘兮千古古誌石華

周珍

珍天寶間國子進士

唐故河南宇文府君墓誌銘 并序

公諱琬字琬代郡武川人也炎帝爲所出之先普回  
曰受符之祖則有定侯岳峙文皇龍躍承家翊魏開  
國稱周弈業英華斯爲盛矣曾祖洪亮皇靈州迴樂  
令祖指皇綏州義合府左果毅父延陵皇朝議大夫  
授絳州司馬雖從事鞅掌而遊心澹泊垂裕積慶寔  
生我公洪惟執志謙默有質端偉義存展惠德不近



名空素業能資乏絕狎朱門匪高軒冕事親孝而奉  
兄友訓家儉而育子慈慕君平而取給欽仲長而不  
仕於是人倫遐矚聲芳坐馳族兄故黃門侍郎嘉而  
悅之因而器之而後朝選尙其不干祿能幹人之蠱  
匪帶財多克家之譽矢死不倦輸誠靡他嗚呼積善  
無據享年未永春秋六十一以天寶三載六月五日  
歿新昌里之私第其載十月廿日窆於萬年縣龍首  
原禮也盈里閭而悽慟及路衢而憐惻伯亡友焉如  
聳違外舅乎猶子感夫男明敏而趨德女柔麗而有  
則未畢婚娶如何閔凶夫人天水趙氏桃李猶春室

家承式痛孀嫠而俄及念遺孤而無怙嗣子逃遂等  
奄茹荼蓼永違顏色旣號天靡訴庶刻石銘休知余  
先人之故也將志其事能旌其德撫孤泣目敢不欽  
承雖荒唐無取申梗概而爲誌矣銘曰

和惠因心謙冲自得持身無玷睦親垂則其一昔爲英

胄今在齊人遐思赤族不慕朱輪其二投迹塵俗勞形

奔走和光葆真人先已後其三天平不傭罹是鞠凶俄

然永隔仰止無從愁扇荒壠泣樹孤松冀星霜兮長

垂令問託金石矣銘彼高蹤其四刻

范朝



朝天寶間廣文館進士

唐故武部常選韋府君墓誌銘 并序

君諱瓊字瓊京兆杜陵人也漢葉崇盛丞相乃擅其名唐業克昌逍遙遂因其號君之苗襲卽其後也曾祖元整皇中大夫使持節曹州刺史上柱國祖稭皇益州成都縣令父景皇廣平郡肥鄉縣令並箕裘嗣業弓冶克傳殷仲文之風流潘安仁之令譽君幼年好學書劍兩全茂邳詵之登科慕班超之投筆封侯未就邁疾俄臻神草無徵靈芝靡驗以天寶四載十二月廿九日終于濛陽郡九隴縣之私第春秋卅有

六嗟乎梁木斯壞哲人其萎織婦罷機春人不相以十四載五月十三日卜葬於長安縣永壽鄉畢原祔先塋禮也南臨太一北帶皇城地勢起於龍馳山形開於宅兆胤子署居喪有禮毀瘠劬勞泣血三年絕漿七日輻車永掩奠徹長施恐筮短之龜長懼陵遷而谷徙式鑄貞石用紀芳猷乃爲銘曰  
帝堯之稟豕韋之枝溫恭其德淑慎其儀佳城鬱鬱玉黍離離月懸新壟松疏舊碑墳塋改變陵谷遷移萬古幽室滕公瘞斯刻

丁鳳



鳳鄉貢進士

唐故河南府叅軍張君墓誌 并序

君諱軫字季心其先范陽方城人也曾祖立弼皇秀才擢第拜長安尉益府功曹贈都督安隨郢沔四州諸軍事安州刺史祖柬之秀才擢第宗社艱難時危反正特進中書令監修國史上柱國漢陽郡王本州刺史食封七百戶碩德金章勳庸茂績傳諸國史備列先碑父漪秀才擢第朝散大夫著作郎佐父潛謀能安漢室建築除呂獻議如昌功亞朱虛侍歸疎受君則著作之第四子聰含誕孕度積公忠體峻晴峯

神高秋色傅母罷乳羶腥靡嘗岐嶷有成詩書便覽往昔中宗復辟邪黨構端大父被奪鳳池歸來典郡見君性不食肉幼及成童奏爲梵苑沙門配居龍興精舍載雖及紀材必爲時君謂釋門之道也祈沒後之因儒門之教也救當今之弊脩惠狹於善己濟世博於蒼生返初服於巾簪捨緇流而冠帶屬天波昭滌祖廟立宗支子從班大才誰繼喟然曰吾當擅鴻筆取青紫卽胄太學舉秀才無何拜河南府叅軍以秀才有後也况官叅河尹攝綰府曹墳藉文章儒宗墨客虛心待士散俸歸仁餘慶未融斯文乃喪味不



知突以逮于終以開元廿年六月五日遘疾不祿於洛陽陶化里私第春秋卅六嗚呼知音者莫不云變風雅之篇什稟江山之清潤方經國而可大尚沉跡而未光痛昭世之早辭乃邦家之殄瘁有集三卷行於代

夫人安陽邵氏備佩針管修整組紉事姑側聽於鷄鳴作嬪潔羞於苻菜訓子得義方之蠱媚居存師傅之儀早歲專德於公宮晚載修心於釋典以天寶四載六月十七日寢疾終於故里私第享年卅有九越天寶六載十月十二日合祔于安養縣相城里先祖

之舊塋禮也嗣子曰緝曰縉欒欒相撫哀哀相次愷悌孝友閎禮言詩既積學而含章亦高墉而射隼女也事夫終遠弄瓦存卑相對悲號皇皇孺慕將題實錄用敘哀詞銘曰

軒轅垂裳支裔分張子孫范陽奕葉全昌從宦遷徙茅舍金章其一猗歟君子炳靈代起文章宮徵弱歲異此不食于肉歸於釋子其二醜飛國庠擢秀明敷繼業聯芳叅卿洛陽嗟乎中折梁壞人亡其三夫人婉德禮全內則毋儀柔克嗣子食國駢馳文墨呱呱相向銘

誌將勒其四石



張晏

晏天寶中奉義郎行儀王府兵曹參軍

大唐清河張府君墓誌之銘

并序

公諱璩字承宗清河東武城人也弧星命氏鵠印傳  
芳歷三代以相韓因五星而輔漢可謂世載其美矣  
曾祖淵隨開府儀同三司江南遼東二道行軍總管  
衛尉卿上大將軍文安縣開國公食邑壹千戶謚曰  
莊德懋懋官功懋懋賞勳賢之業克備于茲祖孝雄  
唐尚輦直長湘源縣令部府司馬鳳輦是司鸞庠作  
化以資佐理實在題輿考敬之侍御史司勳郎中乾

封縣令漢州刺史太府卿禮部侍郎栢署霜威肅衣  
冠於北闕含香伏奏振起草於南臺三異久聞六條  
逾闡恡司出納光我禮闈公卽侍郎公之元子也弱  
歲以宿衛出身中年因常調糜職授秦州叅軍事子  
卿之秩未展驥於長衢王佐之才且叅名於州縣方  
將陟遐自邇必復於公侯寧謂夜壑舟移遽先於風  
燭秀而不實良以悲夫以神龍二年十一月十一日  
終于東京溫柔里之私第享年叁拾有陸夫人瑯琊  
王氏祖方茂伯祖方慶唐中書令同中書門下平章  
事承相門之慶緒得女則之深規識稟天資禮踰師



訓貞芳懿範穆以姻親服澣齋心恭於祠祀將福壽  
於餘慶何積仁而不昌以開元拾柒年柒月貳拾五  
日邁疾終于東京壽安縣之別業享年七十有二並  
以天寶十二載二月十二日同歸耐于京兆府金城  
縣三陂鄉舊塋東北卅二步禮也嗣子恆前饒陽郡  
鹿城縣丞行爲物範材實天經徒積慕於高堂竟流  
悲於風樹九原長往萬古何追痛泣血以銜哀期貞  
石以表德俾余作口用紀玄扃者歟其銘曰  
鍾鼎承家軒裳祖德相韓繼代輔漢表則勳賢克備  
邦家允塞奕葉傳芳威儀不忒邈哉懿範寔曰哲人

才標吐鳳業著成麟二命非偶二豎何親舟移夜壑  
年天青春中野言歸卜宅于此日下荒隴煙埋蒿里  
颺颺松風哀哀孝子昊天罔極生涯已矣

石刻

王叔通

叔通開元中鄆邑令

唐故了緣和尚靈塔銘

并序

開元廿六年歲戊寅七月既望了緣禪師圓寂其徒  
奔相告且求銘焉師蔣姓少多慧悟十三出家自號  
了緣嘗遊於吳會間乙卯遇余於毘陵叩之釋典無  
不通曉年四十渡江而東見鄆雖海濱而山川頗幽



遂遂結茹以終老焉余來鄮甫三月簿書卒卒欲造未果而遽得其耗嗚呼豈所謂大解脫歟時道臘六十有二銘曰

人各有其天舉世孰能全明心見性厥惟了緣石刻

杜敏

敏開元中國子進士蘄州刺史

尊勝經幢銘

孔子曰西方之人有聖者焉不言而自信不口而自理豈非□□□也哉所謂尊勝經缺五而有橫□之所念心口之所□必能左缺入莫梧缺四孝友□□

□□十室忠信缺四專諸缺十始至也缺五元聖缺五

字生豈惟□□色空□□魔妄而已為之銘曰

崇□者缺書寶□□自重下缺

吉温

温故宰相頊從子楊國忠引拜御史中丞安祿山薦為武部侍郎以誅死

處分朝參不到奏

朔望朝參望自今以後除仗衛官外餘官不到兩人以上者及本司官長各奪一季祿五人以上者奏聽處分至冬應合著袴褶并珂織若不具者請準勅彈



奏唐會要二十四

蕭諒

諒天寶中御史中丞京畿採訪使與兄誠皆名能書員外官不許知事奏

近緣有勞人等兼授員外官多分判曹務頗多擾前件官伏望一切不許知事如正員官總闕其長官簡清幹者權判並本官到日停唐會要六十七

戴德永

德永湖州餘不鄉人

請析置武源縣奏

武康東界一十七鄉枕溪澤通舟楫饒魚稻桑竹苧蘆之利請以其地析置一縣吳興志

李昇

昇開元末官衛府卿

行從隊仗送納武庫奏

諸衛行從及冬正等甲仗袍襖旗幕每年行幸温湯及冬正陳設兩京來往諸衛將軍事畢後多有污損逾限不納又比年因温湯行幸所由便奏勒留充冬至及元日隊仗用以此淹久便長姦源兼恐迴換望自今以後每事了限五日內送納武庫如有違限所



由長官及本官望請科違勅罪其典量決杖仍不在  
奏留之限唐會要六十五

鄭權

權開元中官橫海軍節度使

請置歸化縣奏

當道管德州安德縣渡黃河南與齊州臨邑縣鄰接  
自灌家口草市一所頃者成德軍于市北十里築城  
名福城割管內安德平原平昌三縣五都置都知管  
勾當臣今請於此置前件城緣隔黃河與齊州臨邑  
縣對岸又居安德平原平昌三縣界疆境闊遠易動

難安伏請於此置縣為上縣請以歸化為名唐會要七十一

張瑄

瑄太府少卿

賒糶加價折納奏

準四年五月八日并五載三月十六日勅節文至貴  
時賤價出糶賤時加價收糶若百姓未辦錢物者任  
準開元二十八年七月九日勅量事賒糶至粟麥熟  
時徵納臣使司商量且糶舊糶新不同別用其賒糶  
者至納錢日若粟麥雜種等時價甚賤恐更迴易艱  
辛諸加價便與折納唐會要八十八



李知柔

知柔開元中為淮南採訪使按與唐書宗室傳嗣薛

王知柔別

考滿年不得給假奏

縣令考滿準格交付戶口食糧臣近巡按諸州多有

考秩向終替人未到請假便去望每至考滿年州司

不得給假如有先請假未還考滿者勒到百日內却

赴任準格交戶口食糧違者量殿三數選

唐會要六十九

王翼

翼開元中司農少卿

孟月給祿奏

應諸司諸祿望準開元二十八年十月十五日勅並

令孟月三旬內給了仍望預分請日每司一時分付

訖其厯便封送當寺若逢陰雨倉司灼然事故未得

給者當日牒上所由待給諸司畢後準前勘會分付

唐會要六十六

李通

通開元時御史大夫

朱衣袴褶準式奏

每至冬至及緣大禮應朝參官并六品清官並服朱



衣餘六品以下許通著袴褶如有襖故準式不合著朱衣袴褶者其日聽不入朝自餘應合著而不著者請奪一月俸以懲不恪

唐會要二十四

包融

融潤州延陵人官集賢院學士與賀知章張旭張若虛齊名舊唐書作湖州人佶之父也

道虬贊序

沙門道虬年三十三立才獨行亦猶山有鳳凰之雛林養俊猊之子凡百羽毛之族莫不祇畏

吳興藝文補

崔厚

厚字致之官右司員外郎司勳郎中歷諫議大夫

駁郭知運謚議

郭知運承恩詔葬向五十餘年今請易名竊謂非禮謹按禮經云禮時大又曰過時不及為禮也昔衛公叔文子卒將葬其子戍請諡於君曰日月有時將葬矣請所以易其名者蓋以時不可踰也今知運既名不浮行數紀之前門生故吏已合謀諡今乃申請竊將有為而為其子英父頃屬多故屢制方隅朝廷策勳位崇端揆附從者竊不中之禮會無妄之求况今裂土者接軫專征者百輩若率而行之誰曰無請不



惟有司疲於簡牘抑恐名器等於草芥雖欲曲全竊將不可又禮經云已孤暴貴不為父作諡若知運台諡而不以其時則嗣子廢先君之德若不合諡而苟遂其志則先君因嗣子而見尊以僕射而言既詒越禮之謂以國家而言又殊旌善之體請下太常寺重

議唐會要七十九

辛整

罄天寶時人

唐隴西尹公浮圖銘 并序

惟夫智度至廣聖迥彌深實相現而功德是萌無為

開而□斃乃作故真常□寂而寂用無方般若□冥而冥□羣像所以道從果起法逐緣生童□發聚沙□□長老布黃金之迹者也魯有清信士隴西尹公字守珪海童弘達博涉道門玄妙無方何所不應父思禮口跡塵俗正園養真味清白以道□觀袍□而自適夫人范氏四德咸備温貞自恭獻龍女之珠行超十地□韋實之□□三乘缺入舉□□其心□無亢兮少有善譽不幸短命春秋廿有九缺四三載已月六日遇疾缺餓我良人哀百身之不留痛二親之若割嚴父哭喪明之□□慈□泣血之身□仞缺



少習內則貞順自閑事翁姑無毫髮之憾敬口僧有  
 非常之節公自喪此男腸斷疾缺賊以般若冰洗清  
 口心知是病是見口口生若滅口捨之財以天寶十  
 四載四月缺男元口敬造石浮圖一所上千霄漢旁  
 映丹霞光耀壁臺缺四金繩口道缺臆疑翻花而下  
 聽口彈磨琢藝極丹青妙口如在結心是託口口口  
 口口真缺仙一顛非一世之心九層希九族之福今  
 合門志請口思覺缺土塊事彌陀父母之懷至誠所  
 至教遂聞風隨募缺釋迦作教其法唯雄有為成象  
 無髓不空缺煩惱破暗如燈偃邪猶草缺賦象至

廣耳口又元載彫載必貞口堅飛層造缺五翻縈口  
 口鑪繞香煙道口三界善積千年錫彼口者永茲福  
 田天寶十四載八月廿七日書記濬縣金石錄

劉庭玲

庭玲天寶中人

大唐故安鄉郡長史黃府君夫人彭城劉氏龕

銘并序

昔貴立德立言垂範垂訓光而不朽其在茲乎夫人  
 諱字彭城人也擾龍肇裔斬蛇不緒保姓受氏不隕  
 其名曾祖行之唐蒲州永樂縣丞祖延祐安南都護



父含章雍州長安縣尉乃祖乃父克岐克嶷文史縱  
橫衣冠墨耀夫人柔儀穎晤淑問載馳年纔既笄歸  
于江夏黃媿公歷試郡縣懷寶無時屈已從人推財  
重義挹醍醐之正味口般若之妙門爰寫藏經或崇  
塔廟夫人虔事舅姑恭勤夙夜內則罔墜中閨聿修  
男女二人不幸早友掌失口珠帷空弁玉若敖之鬼  
不其餒而伯道之魂天何殄嗣旣而煢居累載靜念  
安神五福斲僊百齡俄奄以天寶十三載口月廿一  
日寢疾終於東京宣教里之私第春葬於龍門南西  
山淨土村太平口律師之塔北長史之龕傍合祔禮

也九原悽愴逝矣難迴兩劍悲鳴翻然冀曉庭玲寸  
宦夢聞哀苦交集雪涕援翰實曠徽音偉蘭菊之長  
存藹金石之無替銘曰

龍門峨峨兮白水湯湯鶴林口兮口兮口玄室光光矧伊  
人兮宅兆口幽魂兮口茫何干齡兮口奄忽緬萬口  
兮垂芳石刻

雷賓泰

賓泰天寶中人

大唐故處士陪戎副尉雷君墓誌銘 并序

君諱詢字明遠關內馮翊郡人也德能匡俗垂寶光



於先功可濟時福慶流於後故祖路曄兮雄勇風骨  
不凡鬱兮清雅神彩異俗應前隨以見用位列錦司  
入大唐而昇朝職臨司馬父通上柱國智可運籌德  
堪濟物不徇私門唯憂報國揮霜戈於隴外戎虜電  
除耀金甲於輪臺骨都膽驚功成遂退賞悅正園知  
命無憂自怡風月君稟陰陽之秀氣天地之雄和維  
孝維忠克恭克敏虛心應物任性歸真坐幽壑以怡  
神臥白雲而放志將爲羨門比壽豈其孔父齒亡以  
天寶五載六月五日構疾於私第終於家館夫人趙  
氏道叶坤順德配乾剛性以謙約爲本行以溫柔作

常訓女垂誠教男義方遷居均善於孟母守志侔貞  
於敬姜何寶婺之昔殞乃龍劍之今淪同臻玉匣雙  
契佳城書帳虛而歛跡粧樓空以生塵幽顯旣分死  
生道隔降婁次誼訾月合葬於仙宮原侍光瑩也孤  
子賓泰敬思遺訓伐稱泉壤以爲銘其辭曰

凜兮儼兮家國稱美情兮綯兮閨闈有軌道契神明  
德侔君子動止不乖於町畦心形豈違於天理任物  
同物委體從流泯然形順徫然入幽琢石飭銘兮光  
德芳聲不朽兮千秋

石刻

杜鴻漸



全唐文三百六十四有傳

停讓帝等廟四時享獻奏

讓帝七太子廟等停四時享獻每至禘祫之月則一祭焉樂用登歌一部時獻俎樽之禮同太廟一室之儀

唐會要十九

與楊祭酒書

顧渚山中紫笋茶兩片此物但恨帝未得嘗實所歎息一片上太夫人一片充昆弟同啜

吳興藝文補

張孚

全唐文三百六十五有傳

州縣官三考一替奏

今年五月十九日制州縣官自今已後宜令三考一替者今數州申解疑三考後為待替到便為勒停今望令校三考官得待替到替人不到請校四考後停

唐會要六十九

于休烈

全唐文三百六十五有傳

不當祭而日食奏

臣謹按曾子問曰當祭而日食其祭也如之何夫子曰按祭而已矣牲至未殺則廢漢初平四年正月當



祭南郊日蝕又行冠禮博士孫與八座議以爲正月  
元日太陽虧而冠有裸獻之禮有金石之樂是爲聞  
災不嚴肅見異不怵惕也望下太常別擇日其二日  
祭太一準禮儀物同祠所旣緣日蝕各守本司亦望  
同下太常更擇日

唐會要  
二十三

蔡希綜

全唐文三百六十五有傳

法書論

余家歷世皆傳儒素尤尙書法十九代祖東漢左中  
郎邕有篆籀八體之法六世祖陳侍中景歷五世伯

祖隋蜀王府記室君知威能楷隸俱爲時所重從叔  
父右衛率府兵曹參軍有鄰繼于八體之蹟第四兄  
緱氏主簿希逸第七兄洛陽尉希寂並深工章隸頗  
爲當代所稱也周宣王史籀作大篆秦始皇程邈改  
爲隸書東漢上谷王次仲以隸書改爲楷法仲又以  
楷法變爲八分其後繼蹟者伯喈得之極元常或其  
亞草聖始自楚屈原章草興於漢章帝楷隸則曹喜  
師宜官梁鵠皇象羅景趙嗣邯鄲淳胡昭杜度窮草  
法則崔瑗崔寔張芝張昶索靖衛瓘衛恒羲獻宋齊  
之間王僧虔羊欣李鎮東蕭子雲蕭思話陶隱居永



禪師唐初房喬杜如晦楊師道裴行儉高士廉歐陽詢虞世南陸柬之褚遂良薛稷其次有瑯琊王昭宗穎川鍾紹京范陽張庭珪亦深有意焉父兄子弟相繼其能者東漢崔瑗及寔弘農張芝與弟昶河東衛瓘及子恒穎川鍾繇及子會瑯琊王羲之及子獻之西河宋令文及子之望東海徐嶠之及子浩蘭陵蕭誠及弟諒如是數公等並遭盛明之世得從容於筆硯始其學也則師資一同及爾成功乃菁華各擅亦猶綠葉紅花長松翠栢雖霑雨露孕育於陰陽而盤錯森梢莘茸豔逸各入門自媚詎聞相下咸自我而



作古或因奇而立度若盛傳於代以爲貽家之寶則八體之極是歸乎鍾蔡草隸之雄是歸乎張王此四賢者自歎百載來未之逮也右軍筆陣圖云夫三端之妙莫先用筆昔李斯見周穆王書七日興歎哂其無骨蔡尚書入鴻都觀碣十旬不返嗟其出羣近代已來多不師古而緣情棄道纔棄姓名夫書匪獨不調端周正先籍其筆力始其作也須急向疾不鷹視鵬遊信之自然猶鱗之得水羽之乘風高下恣情流轉無礙蔡中郎云欲書先適意任情然後書之若迫於事雖中山之毫不能佳也次須正坐靜慮隨意所



擬言不出口氣不再息則無不善矣凡欲結構字體  
未可虛發皆須象其一物若鳥之形若蟲食木若山  
若樹若雲若霧縱橫有託運用合度可謂之書昔鍾  
繇與胡昭俱能爲行狎書繇初師劉德昇後傳蔡邕  
筆法由是學之致妙繇臨終於囊中出授子會曰吾  
精思三十餘年行坐未嘗忘此常讀佗書未能終盡  
惟學其字每見萬類悉書象若之止息一處則畫其  
地周廣數步若在寢息則畫其被皆爲之穿用其功  
如此右軍云夫書之爲意取數非一故紙者陣也筆  
者刀稍也墨者鎗甲也水硯者城池也本領者將帥

也心意者副將也結構者謀畧也颺筆之次吉凶之  
兆也出入者號令也屈折者殺戮也若欲書先乾研  
墨凝神靜慮預想字形大小偃仰平直振動令筋脈  
相連意在筆前然後作字若平直相似狀如算子便  
不是書但得其點畫耳昔宋翼常作此書翼繇外甥  
也叱之翼遂三年不敢見繇潛心改蹟每畫一波常  
三過折每作一點常隱鋒爲之由此而成晉太康年  
有人於許下破宋公墓遂獲此法審此而行用筆之  
理明矣右軍云若作點必須懸手而爲之若作波抑  
而復曳忽一點失所若美女之眇一目一畫失所如



壯士之折一肱可謂難矣每字皆須骨氣雄疆爽爽然有飛動之態屈折之狀如鋼鐵爲鈞牽掣之蹤若勁針直下主客勝負皆須姑息先作者主也後爲者客也旣構筋力然後裝束必須舉措合則起發相承輕濃似雲霧往來舒卷如林花間吐每書一紙或有重字亦須字字意故殊何延之云右軍書蘭亭每字皆措別體蓋其理也時議多之右軍每歎曰夫書者玄妙之伎自非達人君子不可與談斯道右軍之蹟流行於代眾矣就中蘭亭序黃庭經太師箴樂毅論大雅吟東方先生畫贊文咸偶得其精妙故陶隱居

云右軍此數帖皆筆力鮮媚紙墨精新不可復得右軍亦自訝焉或佗日更書無復似者乃歎而言曰此神助耳何吾力能致又云吾少學衛夫人書將謂大能及過江遊諸名山見李斯曹喜書之許見鍾繇梁鵠書又之洛見蔡邕石經又於從兄洽處見張昶華岳碑始知學衛夫人書徒費年月於是遂改本師新於眾碑焉是知學成非一師之能致非好奇博藝之士不能存之予頃嘗爲一體書賦亦略陳梗概今復論之用臻其理夫始下筆須藏鋒轉腕前緩後急字體形勢壯如蟲蛇相鈎連意莫令斷乃須簡略爲尙



不貴繁冗至如稜側起伏隨勢所立大抵之意圓規最妙其有誤發不可再摩恐失其筆勢若字有點處須空中遙擲下其勢猶高峯墜石又下筆意如放箭箭不欲遲遲則中物不入然則思於草蹟亦須時時象其篆勢八分章草古隸等體要相合雜發人意思若直取俗事則不能先發於牋毫張伯英偏工於章草代莫過之每與人書下筆必爲楷則云忽忽不暇草書何者若不以靜思閑雅發於中慮則失其妙用也以此言之草法尤難仲將每見伯英書稱爲草聖衛瓘索靖俱効於張亦各得其妙議者以爲衛得伯

英之筋索得伯英之內漢魏以來章法彌盛晉世右軍特出不羣穎悟斯道乃除繁就省創立制度謂之新草今傳十七帖是也子敬以來學者雖各擅其美故亦抑之遠矣邇來率府長史張旭卓然孤立聲被寰中意象之奇不能不全其古制就王之內彌更減省或有百字五十字字所未形雄逸氣象是爲天縱又乘興之後方肆其筆或施於壁或扎於屏則羣象自形有若飛動議者以爲張公亦小王之再出也旭常云或問書之妙何得齊古人曰妙在執筆令其圓暢勿使拘攣其次識法須口傳手授勿使無度所謂



卷二十一  
筆法也其次在布置不慢不越巧使合宜其次變通  
適懷縱合規矩其次紙筆精佳五者備矣然後能齊  
古人僕嘗聞褚河南用筆如印印泥思所以久不悟  
後因閱江島間平沙細地令人欲書復偶一利鋒便  
取書之嶮勁明麗天然媚好方悟前志此蓋草正用  
筆悉欲令筆鋒透過紙背用筆如畫沙印泥則成功  
極致自然其蹟可得齊於古人又崔長史云其爲書  
也推意結字以斷天下之疑垂明示象以紀天下之  
德山川草木反覆於寸紙之間日月星辰迴環於尺  
牘之上漢光武以中興之主急在安人乃至去上林

池籟之官廢騁望弋獵之事其以手賜萬國者皆一  
扎十行細書成文也靈帝時中郎伯喈碩學多聞經  
籍去聖人久俗求正定六經靈帝許之遂令伯喈丹  
書於碑使工鐫刻立於太學門外于時晚儒後學咸  
取正焉觀視摹寫車乘填溢豈惟一臺推妙十部稱  
賢而已哉古之君子夙夜強學不寶尺璧而重寸陰  
或緝柳編蒲或聚螢映雪寢食靡暇冀其業廣匪直  
祿取一朝故亦譽流千祀勉旃爲之

書苑菁華十二

按與全唐文三百五所收不同

崔行海



仲海元宗朝官元氏縣丞

縣令龐履温清德碑陰記

古人有以觀河洛而思缺義自參毗佐三考于茲初  
□□他邑□或承乏外攝次年以郡□丁賦而役在  
使乎迨歸府從事一周星矣自公之暇聽誦輿人故  
宰龐公其人亡其德不朽有政理碑在龍山觀事往  
歲遷久之不樹埋沒空院人莫能知今良宰李公德  
厚君子繼美前政宣滯德音乎嘗試論之不謀同志  
乃觀其所製永差遺烈屬秋峙實擇雨深莓苔林石  
傾欹文字隱翳□僕者刷清塵黷命匠人揆度形勢

審龜背以勘碑喜魚頭之全魯上唱下和封之建之  
庶黃繭之詞昭然可見墨綬之美永矢不諉時上獲  
寶符建元之十有四載冬孟□哉生魄縣丞博陵崔

仲海字長□□□并記常山貞石志

張尹

尹南陽人

燈臺頌 并序

夫大覺希夷夢以聲色法門高炬普燎羣生卽無因  
之因照有道之道也故知不爲人我□宗稱涅槃佛  
號燃燈田來授記爰以村坊道俗同造石臺良工琢



磨超乎法相且天開寶塔有諸異香地踴蓮花無口  
清淨種種微妙莊嚴道場其猶以燈燃百千炷口佛  
明行故號長明乃為頌曰

忽兮愧今天中天佛與法兮世所先明一心兮遍沙  
界傳一燈兮照大千復說理門無住相復說董修有  
福田欲解大乘明解縛去就還須到本原十地流通  
無罣碍萬法圓融即涅槃借問此臺能供養永口終  
朝常洞然 大唐天寶十一載七月十五日造 常山  
貞石志



唐文拾遺卷之二十一

榮祿大夫三品頂戴前分巡廣東高廉道加四級臣陸心源輯

賈至

全唐文三百六十六有傳

百家類例序

以其婚姻承家冠冕備盡則存譜大譜所紀者唯尊  
官清職傳記本原分為十卷爰列百氏其中須有部  
折各於當族注之通為百氏以隴西李氏為第一 唐會

要三  
十六

王縉



全唐文三百七十有傳

大臣入朝見百寮奏

春秋之義臣子一例今後有大臣入朝百寮望請朝  
罷于中書行相見之禮其宴餞准故事于鴻臚亭集

唐會要  
二十四

劉晏

全唐文三百七十有傳

懇讓吏部尚書表

伏以天官之職師在冢卿任當選仕之權班居諸曹  
之首至密者可以啟事至明者可以論材內者無能

何堪就列且轉輸之務國家之常千倉萬庾陛下之

粟也槁工楫師陛下之人也縱萬億及秭達于京師

邦賦獲殷軍儲克贍此亦常理于臣何功况受任以

來淹引歲月減耗頗有委積非多經費所支尚貽聖

慮在臣之責實亦難逃夙夜惕厲不遑啟處豈敢取

眾人之力以為己勞守臣下之分因而受遺速其官

謗紊以朝經願迴震光乞寢前命

冊府四百  
六十四

全唐文檢點祭器奏

諸色祠祭委禮儀使撰禮料為常式祭前點檢祭器  
及饌物明衣有不在者所由量事料決其行事官若



出齋宮及不到明衣及料不得妄唐會要二十三  
包估

全唐文三百七十有傳

請詳定開元時令奏

開元刪定禮記月令為時令其音及義疏並未刊正  
其開元禮所與月令相涉者請選通儒詳定唐會要七十七

明立私錢賞罰奏

江淮百姓近日市肆交易錢交下粗惡揀擇納官者  
三分纔有二分餘並鉛錫銅盪不敷斤兩致使絹價  
騰貴惡錢漸多訪聞諸州山野地窖皆有私錢轉相

貨易奸濫漸深今委本道觀察使明立賞罰切加禁

斷唐會要八十九

社稷改用太牢奏

春祭社稷准禮天子社稷皆太牢至大曆六年十月  
三日勅中祀少牢社稷是中祀至今未改唐會要二十二

劉秩

全唐文三百七十二有傳

政典

我皇帝思侔前古永傳後裔下無山甫將明之才乃  
聽百藥偏昧之說從羣臣之小議挫為國之大經設



爵無上署官不職王澤不布人無承化遂令刑辟未  
弭國用不殷權柄擅于后氏社稷絕而復存揆久安  
之由在于取順而難爲逆絕欲奪之原在于單弱而  
無所憚此卽事之明驗也百藥不詳秦漢晉宋齊隋  
得失之異謂不足法復忽消于賈曹劉陸成敗之說  
妄之天命天之所命人事而已棄人事捨天理滅聖  
智任存亡也故建侯者所以正冢嫡安父子之分使  
不相猜貳豈藩屏王室已哉夫先王之尙封建也非  
止貴於永久貴其從化而省刑故郡建則督責督責  
則刑生國開則明教明教則從化從化之行因於封

建封建則諸侯之制與天子備同備同而禮殺禮殺  
然後可宣教化宣教化則仁義長仁義長則尊卑別  
尊卑別則禍亂息此封建之所以易爲理也郡縣之  
理可以小寧不可以久安可以責成不可以化俗嗚  
呼上無堯舜猶可也有堯舜之德欲廣其澤捨此何  
以哉自漢以降雖封建失道然諸侯猶皆就國今封  
建子弟有其名號而無其國邑空樹官僚而無蒞事  
聚居京輦食租衣稅國用所以不足也

唐會要  
四十七

李玘

全唐文三百七十三有傳



選人自覓保識官奏

宗子諸親齋郎室長選人準格每年遣諸陵廟丞等  
充保識官今請選人自于諸司求覓清資及在任宗  
子京官充保識以憑給解伏乞編入吏部選格以為  
久例

唐會要  
六十五

柳渾

全唐文三百七十七有傳

請改名奏

頃為狂賊點穢臣實恥稱舊名矧字或帶戎時當偃

武請改名渾

南部  
新書

李泌

全唐文三百七十八有傳

學士去大字疏

伏蒙以臣為集賢殿大學士竊尋故事中書令張說  
中朝元老碩德鴻儒懇辭大字眾稱達禮其後至德  
二載崔圓為相加集賢殿大學士其後因循遂成恆  
例伏望削去大字崇文館大學士亦準此

唐會要  
六十四

歸崇敬

全唐文三百七十九有傳

上丁釋奠講論奏



上丁釋奠其日準舊例合集朝官講論五經文義自  
大曆五年以前常行不絕其年八月以後權停講論  
今既日逼恐須復依舊奏唐會要三十五

請罷袴褶奏

按三代典禮兩漢史籍並無袴褶之制亦未詳所起  
之由隋代以來始有服者事不師古請罷之唐會要二十四

御署祝版奏

每年春秋二時釋奠祝版御署訖北面而揖臣以為  
其禮太重按大戴禮師尚父授周武王丹書武王東  
面受之請參酌輕重庶得其宜唐會要三十五

嚴武

武字季鷹房瑄薦為執事中坐瑄事貶巴州刺史久  
之擢劍南節度加檢校吏部尚書年四十卒

御史給公乘奏

應在外新除御史赴臺停止店肆事亦非宜仍令所  
在給公乘發遣以為永例冊府

巴州古佛龕記

巴州城南二里有古佛龕一所右山南西道度支判  
官衛尉少卿兼侍御史內供奉嚴武奏臣頃牧巴州  
其州南二里有前件古佛龕一所舊石壁鐫刻五百



餘鋪劃開諸龕化出眾像前佛後佛大身小身琢磨  
至堅彫飾甚妙屬歲月綿遠儀形虧缺乃掃拂苔蘚  
披除榛蕪仰如來之容爰依鷲嶺祈聖上之福新作  
龍宮精思竭誠崇因樹果建造屋宇叁拾餘間并移  
洪鍾壹口莊嚴福地增益勝緣焚香無時與國風而  
蕩穢然燈不夜助皇明以燭幽曾未經營自然成就  
臣幸承恩宥馳赴闕庭辭日奏陳許令置額伏望特  
旌裔士俯錫嘉名降以紫泥遠被雲雷之澤題諸紺  
宇長懸日月之光兼請度無色假有道行者漆僧承  
以住持俾其修習勅旨其寺宜以光福爲名餘依乾

元三年四月十三日

金石苑

韓濟

濟乾元中大理評事巴州長史

唐救苦觀世音菩薩像銘

茲救苦觀世音菩薩像者巴州刺史嚴武奉報烈考  
中書侍郎遠日之所鑿也乾元二年正月十三日大  
理評事兼巴州長史韓濟銘曰  
於鑠使君孝心不忘□□菩薩靈相克彰昊天永永  
思報無量□□岳岳庶乎有常

石刻

崔巨



巨字爲式大厯中右補闕殿中侍御史

大唐宣州刺史薛公碑

按新安志九及寶刻叢編十五引復齋碑錄

皆作崔巨撰文見全文闕名今存其目

獨孤及

全唐文三百八十四有傳

鄭駙馬孝行記

特進駙馬都尉滎陽鄭潛曜字某

五字英華作鄭睿  
曠潛曜其字

宗外孫元宗之甥代國長公主之才子也睿敏而文

生知純孝開元中長公主寢疾公年二十八觸燧侍

左右帶不解面不饋者累月嘗藥請禱憂懇備至而

疾無瘳乃刺血濡翰書爲策

英華作榮祝請命于上下神

祇願以身代親之身乞靈祈死泣盡繼血旣而誠達

於神感而遂契徹筵俟命焚其章草

英華作畢獨神道許

三字在乎

二字作存於

煨燼之中翌日長公主疾閒公固

命左右勿敢言於其請天之章公之客尹靈琛之辭

也向微靈琛言之則人莫知之者矣君子謂天道遠

人道邇其死生冥運吉凶陰隲未嘗與人

英華作天同功

也而孝子竭誠上元爲感神符靈貺來若響答乃知

行或精至則幽明

英華作冥

不能逃其應而况人乎鄭氏



之行其事親也可謂孝矣惟武王周公與天合德三  
 壇之祝宜有不應若公者也英華作地在綺襦紈袴之中  
 非有植璧秉珪之禮而精誠上之神亦降福非德性  
 純至其孰能致感如此其速者歟公開元二十八年  
 尚元宗第十二女臨晉長公主公主柔明而賢輔佐  
 以禮公力行好學處貴不驕跋履夷險無替忠信歷  
 太僕光祿嗣榮陽郡公佩金印列長戟垂三十餘載  
 克荷大業而崇其家聲善而必慶為不誣矣懼他日  
 史氏闕疑也故著之於篇本集

田伏寶

伏寶恆州人

造象刻經記

弟子田伏寶為先亡父兄見存母弟往為門虧十善  
 不樹福緣姪巖殞命於同羅女子天辭於白日虔心  
 告佛罄志歸依敬就三門石柱刊阿彌陀佛蜜多心  
 經以乾元元年四月五日鐫鏤功畢桑海有改變遷  
 移經像固存乎不朽合家眷屬法界有緣同霑斯福

常山貞石志

賈耽

全唐文三百九十四有傳



華夷圖玉山記

玉山與天際勢聯北斗又名玉斗山循山之麓升降  
 凡十有五里至大洋坂地寬曠約數百畝而奇峰秀  
 嶺恠石深池環列于前後左右真仙靈之窟宅也山  
 有龍潭一十八磔又有二十四奇曰玉瑯峰銀尖峰  
 七盤峰獅子峰石牛峰雲蓋峰蟠龍峰金雞墩洗墨  
 池望香墩九蓮池天門峰飛泉峰屏風峰誓坡石浴  
 佛池彩霞巖過雲洞連理木天聖松金剛嶺石鼓山  
 羅漢峰志初巖真一邑勝概之尤者也故縣亦由此  
 名

游名山記

劉太真

全唐文三百九十五有傳

諸道供紙張奏

準貞元元年八月二日勅當司權宜停減諸色糧外  
 紙數內停減四萬六千張續準去年八月十四日勅  
 寫經書令諸道供寫書功糧錢已有到日見欲就  
 功伏請於停減四萬六千張內却供麻紙及書狀藤  
 紙一萬張添寫經籍其紙寫書足日即請停又當司  
 準格楷書八年試優今所補名皆不情願又準今年  
 正月十八日勅諸道供送當省寫經書及校勘五經



學士等糧食錢今緣名補楷書未得解書人元寫經  
書其歷代史所有欠闕寫經書畢日餘錢請添寫史  
書唐會要六十五

王璈

全唐文三百九十五有傳

唐故朝議郎行登州司馬上柱國王府君墓誌

銘并序

公諱慶字弘慶東萊掖人漢議郎扶卽其先也崇勳  
重爵允光前史休風茂範克被後昆祖相隨任齊州  
錄事參軍考過隨任濟州東阿縣令並容表魁傑機

神穎悟雖位不充量而行足揚名公幼得奇童之目  
早標正人之稱多才藝尙冲簡隱不違親貞不絕俗  
年甫弱冠河濟名流翕然已想望其風矣龍朔初刺  
史河南邱孝忠褰襜海甸下車未幾便引公爲談客  
時高麗餘孽作梗遼川詔徵舟師濟自黃腫邱君以  
公有深謀遠算遂要在中權同郗超之入幕類田疇  
之出塞閱賞酬庸拜上柱國軍罷勅授昭武校尉營  
州都督府瀘河鎮將馬邑蕭條龍山阻絕肅恭王事  
余病未能久之除雅州和州鎮將昔我先君嘗旋驂  
於九折願惟嶽尙願摶閉於一邱是時太夫人在堂



有羸老之疾公孝性純懇興言飲淚衣不解帶藥必親嘗居喪之禮哀毀過制萬歲通天元年白虜趨起鋒交碣石青林失律火照甘泉天子詔左衛將軍薛訥絕海長驅掩其巢穴飛葦輓粟霧集登萊監軍御史范玄成與公素遊捐公清幹且以務簡得兼統押乃密表馳奏朝廷許焉俄除朝議郎行登州司馬仍充南運使恩命光臨飭躬就列情勤悅使義薦均勞糗粟齊山飛雲蔽海三軍歎口僉曰得人聖曆年運停還任公雅愛虛寂林壑之致始終不渝雖踰塵滿庭常嘯詠無輟昔桓温每云我方外司馬豈斯之謂

歟何圖天屬不戒奄從化往春六十七以神龍元年十一月二日卒於官舍嗚呼哀哉夫人同郡呂氏劔履舊族言容夙備作配君子宜其室家而與善徒欺未秋先落粵開元九載龍集辛酉十一月甲辰朔六日己酉昭啟靈殯合葬於掖城東南五里岡掖山之陰禮也嗣子瀛州司戶叅軍璈處孝出忠自家形國啼枯栢樹思結寒泉勒豐石於夜臺播餘芬於永世

銘曰

偉哉華胄世濟賢秀猗歟若人不忝其舊幼有令名長□宦情飛談入幕堅臥辭榮始乃事親終惟報國



方舟轉饒遼水無極展驥來旋仁風允塞雅懷未愜  
痼疾彌留荒涼池館零落山邱劔埋同匣樹聳行楸  
蒼蒼日暮煙鳥空愁石刻

臧希晏

希晏寶應初左金吾將軍

街鼓減常式奏

諸街鋪鼓比來依漏刻發聲從朝堂發遠處每至夜  
纔到伏望今日已後減常式一刻發聲庶絕違犯唐會要七十一

王淑

淑乾元中右金吾長史

醫術請同明法奏

醫術請同明法選人自今已後各試醫經方術策十  
道本草二道脈經二道素問十道張仲景傷寒論二  
道諸雜經方義二道通七以上留已下放又尙食藥  
藏局請同典膳局太醫署請同大樂署唐會要八十二

胡詹

詹永泰中幽州節度判官兼掌書記朝議大夫行監

察御史

按新順天府志作明詹

大唐故高士滎陽鄭府君之碣



府君諱忠字惟忠滎陽人也其先出自周宣王母弟  
友受封於鄭字缺六為字缺六代為韓字缺六侯後以國命氏  
枌榆甲族繼美滎陽閥閱名賢散居天下七代祖覽  
河間太守封鄭亭侯生幽州錄事參軍昌昌生高祖  
武清令羅漢屬隨室土崩豪傑雲起有若竇建德者  
聚兵稱亂圍逼武清時獨堅守孤城確固臣節字缺六神  
堯踐祚壯之加右衛大將軍宰縣如故進封永年公  
食邑一千戶茲邑建功之地子孫克守勳業至今家  
焉生曾祖諱贊贊生字缺六祖諱字缺六志俱以儒術著聞頻  
徵有道不起生皇考諱承元博學多藝時元帥楊公

問罪東夷請於幕府以豹畧謀於軍事及還恥受討  
遼之功拂衣高蹈以例授陪戎副尉上護軍終不言  
祿節也府君卽副尉之元子風概天資碩德山立長  
材偉貌虬髯虎膺心游六經家字缺六二事孝悌仁信禮  
讓溫恭皆發於自然如竹箭之有筠也早勤色養不  
願從仕中服儒行不沾於名晚固幽貞不趨於世是  
以鄉黨三薦孝廉皆不之應其晦跡也恬然靜默其  
偶俗也同為滑和致身於木雁與物為芻狗謂為慕  
隱不處於山林謂為趨榮不親於朝市人徒識其貌  
不測其心徒仰其高難師其行至於王霸大略馭人



體要守宰欽風諮謀政術者踵至於門矣他日嘗獨立謂其子希潮吾闇測天道靜觀人事九六之運莽卓之災將丁聖代爾當堅秉誠節勤修令名嗟吾道衰良恐不免居十數歲果安氏逆命竊據洛陽將欲崇式眞賢輝光僞位以府君林廬潛蹈馨香遠聞姑欲繫維允塞人望迫令強起尉於長豐則知烏戾於天雲羅得之魚潛在泉川罟得之僞命逼於正人烏可脫也雖欲逃於天穴於泉其可得乎史氏繼亂抑授東光縣丞轉奉義郎左衛尉兵曹參軍上護軍旣睽宿心曾不視事拂衣解印請留幽都闔門靜居屏

弃塵事獨與一二道者遊息乎家園幽賞琴壺倚傲雲月進則□爲退能全高卷舒在懷語默兼遂君子曰智哉以大盜未清沉憂成疾年五十七壬寅歲夏四月乙亥傾背於挹樓里之私第冬十月聖上翦四滑清三光凡拒凶徒特加超授議者以府君遇亂脅從矢節無撓逢時旌善生涯不留悲夫故書曰高士成府君之志也夫人彭城劉氏柔順以成孝貞正以起家蕙心先□椒頌仍在丙申歲夏五月二十有七日先府君而終享年五十有三嗣子希潮血毀長號骨立過禮以今年十有二月庚申安神於武清縣西北崇



仁鄉白塔東北原合耐於先塋之左喪事尙儉奉遺  
誠也夫聳曾峯者磐乎厚地漢洪流者發自深淵府  
君德邁於前錫羨於後故嗣子以功驟遷金紫光祿  
大夫歷太僕卿文安郡別駕轉殿大監幽州節度判  
官上柱國位雄卿月文頌國風佐理鄭南惠懷邑屋  
暹籌薊北磔裂儋林鬱此國植獨耀鄉錦得非府君  
善訓積慶之祐也以爲曠先構者匪仁揚美名者謂  
孝況白華之悲罔極緇衣之頌未傳詹與殿監在幕  
密交匪才見託俾颺先碣永示後賢詞曰  
於赫我祖榮陽系先顯允烈考分族居燕才用駿發

心機鏡懸芥視小節雄成大賢其一大賢伊何以孝忘

仕忘仕伊何屢薦不起博考墳籙工言政理邁爾凶

徒玷我良士其二身擺偽祿口吟歸田獨與道者同栖

浩然閉門柳其三虛室草玄遠從零露俄悲逝川其三角

立貞臣慶流賢子卿月高鑒堯天佐理政必移風清

逾飲水柴也泣血杖而後起其四怙恃合耐毀瘠偏傷

途搖白旒棺飾黃腸山門寂寂隴樹蒼蒼秉茲幽節

永播清芳其五石刻

陰庭誠

庭誠大厯中鄉貢明經攝燉煌州學博士



大唐隴西李府君修功德碑記

上飛閣□□霞連依□□居□□出人境聖□時照一川  
星懸□鐘缺四雷□靈仙鬼物往往而在屬以賊臣  
千□□寇缺四地維暴殄天物東自隴坻舊陌走狐  
兔之羣西盡陽關遺邑聚豺狼之窟□木夜警和門  
書扇塔中委塵禪處生草時有住信士朝散大夫鄭  
王府諮議隴西李太賓其先指樹命氏紫氣度流沙  
之西刺山騰芳□名感懸泉之下時高射虎入望登  
龍開國西涼稱藩東晉諮議卽興聖皇帝十三代孫  
遠派天分世濟其美靈根地植代不乏賢六代祖寶

隨使持節侍中西陲諸軍事鎮西大將軍領護西戎  
校尉開府儀同三司沙州牧燉煌公玉門西封邑三  
千戶曾祖達皇燉煌司馬其後因家焉祖操皇大黃  
府車騎將軍考奉國皇昭武校尉甘州和平鎮將早  
逢昌運得展雄材一命是凌雲之資百齡懷捧日之  
慶垂條布穎業繼弓裘築室連閭里成冠蓋難兄令  
弟卓然履道之賢翼子謀孫宛爾保家之主諮議天  
授淳粹神假正直交遊仰其信鄉黨稱其仁義泉深  
沉酌而不竭道氣虛遠感而遂通嘗以爲挹江海者  
難測其深淺望乾坤者不究其方圓況色空皆空性



相無相豈可以名言悟豈可以文字知夫然故方丈  
小室默然入不二之妙智度大道法爾表無念之真  
以其虛谷勝聲洪鐘應物所以魔宮山坵佛曰天開  
愛水朝清昏衢夜曉一音演法四眾隨緣直解髻珠  
密傳心印凡依有相卽是所依若住無爲還成有住  
由是巡山作禮歷險經行盤迴未周軒轅□斷刻削  
有地締構無人遂千金買工百堵興役奮鎚龔壑榻  
石聒山素涅盤像一鋪如意輪菩薩不空罽索菩薩  
各一鋪畫報恩天請問普賢菩薩文殊師利菩薩東  
方藥師西方淨土千手千眼觀世音菩薩彌勒上生

下生如意輪不空罽索等變各一鋪賢劫千佛一千  
軀初坏土塗旋布錯彩豁開石壁儼現金容本自不  
生示生於千界今則無滅示滅于雙林考經尋源備  
物象設梵王奔世佛母下天如意聖輪圓轉三有不  
空妙索維持四生人其報恩天則請問六牙象寶搖  
紫珮以棲眞五色獸王載青蓮而捧聖十二上願列  
於淨刹十六觀門開其樂土大悲來儀於鷲嶺慈氏  
降跡於龍華丕休哉千佛分身聚成沙界八部敷眾  
重圍鐵山希夷無聲悉宰欲動爾其簷飛鴈翅砌盤  
龍鱗雲霧生于戶牖雷霆走於階陛左豁平陸目極



卷二十一  
遠山前流長河波映重閣風鳴道樹每韻苦空之聲  
露滴禪池更澄清淨之趣時節度觀察處置使開府  
儀同三司御史大夫蔡國公周公道洽生知才膺命  
世清明內照英華外敷氣邁風雲心懸日月文物居  
執憲之重武威當杖鉞之雄括囊九流住持十信爰  
因蒐練之暇以申禮敬之誠揭竿操矛闕戟以從蓬  
頭胼胝傍車而趨熊羆啟行鶴鸞陪乘隱隱軫軫蕩  
谷搖川而至於斯窟也層軒九空複道一帶前引簫  
唱上干雲霓雖以身容身投跡無地而舉足□足登  
天有階日窮二儀心出三界有若僧政沙門釋靈悟

法師卽諮議之愛弟也戒珠圓明心鏡朗徹學探萬  
偈辯折千人出火宅於一乘破空遣相指化城於四  
坐虛往實歸於是引兄大賓弟朝英姪子良子液子  
望子羽等拜手於塔下法師及姪僧志融斂袂於堂  
上曰主君恤人求瘼哉難濟時井稅且均家財自給  
是得旁開虛洞橫敞危樓將以翼大化將以福先烈  
休庇一郡光昭六親況祖孫五枝圖素四殺堂構免  
墜詒厥無慚非石何以表其貞非文何以紀其遠且  
登高能賦古或無遺遇物斯銘今豈遐弃紛然遞進  
來以求蒙蔡公乃指精廬而謂愚曰操斧伐柯取則



不遠屬詞比事固可當仁仰恭指歸俯就誠懇敢□

□其狂簡庶髣髴於真宗□大曆十一年龍集景辰

□□□有十五日辛未建西域水道記

第五琦

琦字禹珪以吏幹進官諸道鹽鐵鑄錢使進度支郎中兼御史中丞拜同平章事貶忠州長史起為朗括饒湖四州刺史終太子賓客東都留守

常平倉奏

每州置常平倉及庫使自商量置本錢隨當處米物時價賤則加價收糴貴則減價糶賣唐會要八十八

請旌表竇升朝二女奏

軍天縣竇昇朝二女伯娘仲娘雖長於村野而幼有志操住與邠州接界草賊數千人持兵刃入其村落行剽劫聞二女有容色姊年十九妹年十六歲藏於巖窟間賊徒擬為逼辱乃先曳伯娘出行數十步又曳仲娘出賊相顧自慰行臨谷伯娘曰我豈受賊汚辱乃投身於谷賊方警駭仲娘又投於谷谷深數百尺姊尋卒仲娘脚折首破血流肢體氣絕良久而蘇賊義而去冊府一百三十九

錢庭篠



庭篠大厯中官秘書省著作郎

唐故太中大夫太常寺丞兼江陵府倉曹張公

墓誌銘 并序

公諱銳字郊侯姓張氏清河人也派引南陽光連景宿儀以縱橫爲秦相禹以經術作帝師盛烈茂勳代有人矣曾祖志鄜州洛交縣令祖彥昇贈鄧州長史父惛朝議大夫號州長史公號州之長子也生則秀異幼而聰敏雅傳黃君之經深得臨池之妙未弱冠入仕以門蔭宿衛解褐授右司禦率府兵曹至德中充四鎮節度隨軍判官知支度事轉恆王府掾加朝

散大夫轉光祿丞賞有功也屬西蕃未靜國步猶虞或從幸關東或隨軍幕下尊奉使宣傳聖旨陷沒賊庭者久之公辯說縱橫權謀應變陳之以禍福懼之以威嚴既迴有詔特遷太中大夫蜀王府司馬嘉其節也公以恭承睿略遠仗天威於我何功固辭不拜前後三□方允乃授今任焉由是恩制授太夫人長樂縣太君禮有崇也以板輿迎侍于江陵申祿養也公幹於從事清有吏能勤勞自公出納惟愴且夫奉使不屈忠也揚名立身孝也方期積慶用以成家天道何常降年不永以寶應二年正月廿五日及歿于



汪陵府之官舍春秋廿有七以今大曆九年歲次甲寅三月四日癸卯窆於京兆之鳳栖原從太君之新塋也澹澹春雲垂陰陌樹冥冥厚夜獨閱幽泉嗟兩散以風搖空父臨而弟拜銘曰  
後生可畏兮誰與爲徒張氏之子兮其庶幾乎苗而不秀有矣夫庭折芳蘭兮掌碎珠太君塋旁兮左愛子千秋萬歲兮魂不孤

石刻

盧元裕

元裕字子寬刑部侍郎劍南節度太原尹太子賓客請重杖不致死奏

準式制勅與一頓杖者決四十重杖一頓者決六十無文至死式內自有殺却處盡等文卽明重杖卽合加數京城先因處分決殺者多一死不可復生望準式文處分或決痛杖一頓者式文既不載亦請準重杖六十例不至死

冊府一百一十二

韓擇木

擇木昌黎人大曆中工部尚書歷右散騎常侍

相國帖跋

相國狄公元功盛德垂之萬代顏尚書家有其請太子歸京師手奏七百餘字以示昌黎韓擇木爲書于



其後子孫寶之

張從申

從申吳郡人大厯中進士檢校禮部員外郎官至大理司直工書文弟從師從義從約稱張氏四龍

重刊季札墓碑記

夫子篆季子墓凡十字厯代緜遠其文殘缺人勞應命其石湮沒在昔開元中元宗勅王仲雍模搨其本尙可得而傳者暨大厯十四年己未歲潤州刺史蘭陵蕭定重刊于石憲章遺範以永將來吳郡張從申

記汗簡卷七

李宥

宥大厯中人官藁城縣主簿

大解慧寺三門樓讚并序

後魏興和二年置寺名之靜觀大隨開皇十一載也改創解慧爲文北近滹沱大川西負井陘巨鎮山勢邈迤依依目前河流潺湲繚繞金剎寶殿昔立長廊舊成門之不修梵宮未備□如意年中有高僧日寶弃世從道秉心安禪悟真如達無生白日雨天花爲吞清夜擁毒龍爲衛願修佛事隨喜興功大聖啟心羣生響應乃親自仗錫詣乎山林等喬松求巨石良工



卷二十二  
庶木剡之爲棟山神指石石化爲柱旣人神乎勑力  
乃何往乎不濟然後雕朱粉鏤文彩基上爲門門上  
爲樓三門之義其大矣哉是將化羣俗崇善因悲火  
宅之將焚引凡愚於淨界雙林之地寶樓化域有千  
般蕙草明媚於前列百丈喬林鬱盤於後清心一陟  
如登刁利之天梵宇徧遊悉獲菩提善果頃北虜南  
侵河朔驚震城郭宮室列火而焚父子兄弟揮刃而  
死大師樓上隕身而下毫髮無傷口誦佛頂神經刀  
仗乃向身而斷壞心持救苦之念寶樓乃火不能燒  
胡曉□羣啟顙而□北有鴈塔建乎齊朝香剎上凌

青雲登陟迥超三界爲蒼生大機令迷津自達彼岸  
鎮滹沱巨水乃河龍不敢南侵此乃寶公前生所造  
人傳聖跡悉有明徵寺內者德臻海童子出家清心  
入道爲梵宮之主繼前聖之心上坐崇俊□年披衣  
□立大功建寶堂於常住精持般若開釋教於蒼生  
同力禪宮俱成佛事維那法廣性明了智通惠爲僧  
衆之領袖秉伽藍之紀綱合寺僧徒悉皆清淨少長  
有禮威儀不忒持鉢同歸想祇園而目觀洗足圓坐  
如釋迦乎斯在□一尉於此□簿於是向五□焉春  
秋廿有四也性狂簡非佛法忽經戒傲三寶出入以



卷二十一  
漁獵爲樂饕食以酒肉爲味口逸其性三塗業成有  
大法師曰珠言余之義兄也身長七尺江目海口心  
明玉鏡色淨蓮花演大乘經救蒼生於此邑至四月  
初結夏茲寺招余往來初言禍福之門再指吉凶之道  
愍我如是令歸善因余知昔非稽首從命謂余曰聖  
跡如是大功無紀千歲之末誰人共傳子其誌之請  
不辭也敢不承命書詞後焉詞曰  
大師寶公能安禪至今日乎一百年過門樓乎金剎  
前念救苦兮賊不害力禪通兮火不然成大功而百  
三天故有爲以入無爲結有緣乎福無邊大歷十二

年六月六日記

常山貞  
石志







遺谷超原於是穿窈窕躡嶇嶇緣雲搏壁極乎所聞  
觀其陽崖劃開陰壑旁轉懸水百仞注而成潭萬象  
奔走以呈形羣峰回合而却倚練影挂於層漢雨聲  
散於長林潺潺然無晝夜而息雖天台之飛流茂以  
過也吾徒盥於斯鑑於斯塵心洗然世慮都遣啜香  
茗以傲睨招清風而詠歌足以長道機滌煩想功名  
軒冕於我爲賓矧夫上隱雲天下臨佛土巖岫皆藹  
時人穿窺禪菴居解虎之僧洞墟棲鸞之客永言  
長往其可乎哉封公曰異乎夫子之說方今國步未  
安兵革多故忠臣佐世之立志士嘗膽之秋遽欲退

閑恐非通論僕曰唯唯幸無重吾過請從子而歸回  
首林蘿謝白雲而去刻彼巖石聊紀盛游時大曆十  
二年暮春上巳之明日也

巖陵集

韋光輔

光輔代宗朝太府少卿

改造銅斗尺秤奏

今以上黨羊頭山黍依漢書律厯志較兩市時用斗  
每斗小較八合三勺七撮今所用秤每斤小較一兩  
八銖一分六黍今請改造銅斗斛尺秤等行用

唐會要六

六十



韋纘

全唐文卷四百有傳

大唐華州下邽縣丞京兆韋公夫人墓誌銘序并  
維唐大曆十三年三月廿五日韋公夫人遭疾終于  
長安親仁里之私第夏四月口遷殯萬年縣加川鄉  
西原時無良禮不備故也貞元庚午歲二月廿三卜  
叶禮具返葬洪固鄉韋之舊壙附皇姑也享年卅九  
孝子之感倍焉夫人姓王氏其先太原晉陽人也九  
代祖亮後魏比部尚書西河郡公尚書令中山郡王  
叡之弟也曾祖真行有唐汝州葉縣令口恒怡河南

尹東都留守初爲御史正憚姦息父毗京兆府奉先  
縣丞夫人少喪怙恃終鮮昆弟年十七歸于下邽公  
公五代祖孝寬周爲大司空隋爲雍州牧其後登三  
台列入座焜煌國史此不具舉夫人惠和懿柔稟之  
自然故韋口門大族茂能卑以自約祗上接下而人  
無閒言事姑惟勤口天以敬踰廿載婦道睦如也口  
子均育免懷就傅親賢慤口母儀溫如也華靡不改  
欲榮耀不汨志安買臣之尙貧知口口之未遇敬孟  
齊口梁鴻比德君子謂之無媿辭宜乎鍾壽昇口口  
何先露早世時口彼蒼仁者之惑嗚呼哀哉有子五



人日纈曰潔曰系曰縮曰紆免三年之喪茹終身之痛恭守儉薄爰卜安兆封樹將立日月有時攀塗車而莫及輒泉扃以凶極恩盡苴泉悲長霜露是用祇述景行式楊幽窆銘曰

行備德充反殲其躬哀子泣盡良人室空碎殞還鄉魂安孝終口櫛有折慕思無窮石刻

張延賞

全唐文四百三十二有傳

請減官收俸料資西討奏

為政之本必先命官舊制官員繁而且費州縣殘破

職此之由臣在荆南劔南當管州縣闕官員者或數

十年吏部未嘗補授但令一官假攝公事亦理以此

言之官員可減无可礙也今請減天下官員收其祿

俸重募戰士從立佐收復河湟軍用不匱乏矣册府

三十

陸羽

全唐文四百三十三有傳

顧渚山記

豫章王子尚訪曇濟道人于八公山道人設茗子尚味之云此甘露也何言茶名也吳興藝文補



韓滉

全唐文四百三十四有傳

同中書門下加俸奏

准今年四月二十八日恩勅加給京文武官九品已上正員官月俸其同中書門下平章事不帶正官勅內無額應檢校同中書門下平章事並請同正官例就一高處給

唐會要九十一

崔造

全唐文四百三十四有傳

進狀先本司奏

亡官失職婚田兩競追理財物等并合先本司本司不理然後省司省司不理然後三司三司不理然後合報投匭進狀如進狀人未經三處理及事非冤屈輒妄來進狀者不在進限如有急切須上聞不在此限其妄進狀者臣今後請并狀牒送本司及臺府處

理

唐會要五十五



正十五  
 則其安葬也非吾國今尚南并州縣數本同文蓋其  
 碑文來豈非吾不吾其則收其意於土間不其也  
 合葬其地則收葬人未葬之其地或事非其地  
 小豈然其自其自其自其自其自其自其自其自其  
 丁官其地則收其地其地其地其地其地其地其地其地

李季平

季平隴西人

唐故金紫光祿大夫試太子詹事兼晉州刺史

上柱國隴西郡開國公李公墓誌銘 并序

山有發地崛起者謂之靈岳木有梢雲挺權者謂之  
 長材然木之秀也遇驚風或折山之峻也有朽壤則  
 崩噫以人事擬其倫我李公近之矣公諱良金隴西  
 人也五代祖儉佐高皇帝定都於雍因居幽郊子孫  
 不遷遂傳於新平矣皇祖素甯州真甯宰大父亨絳



州長祚府折衝烈考宗益州新繁令或墨綬馳聲或  
鷓冠陳力皆樹德積善而鍾美於公公卽新繁府君  
之次子也幼而銳敏長而英奇氣鬱風雲心堅鐵石  
弱冠忽投筆太息杖劍獨遊時朔方節度副使論公  
遇公而寘之幕下口後出奇破敵戡難計功卅年間  
累有遷拜日者受分符之寄於晉也人樂其化吏畏  
其威雖迫兇徒而身處唐郊亦懷王命而心馳魏闕  
間歲職營田之務於蒲也規畫疆理巡閱耕耘法立  
令行人莫敢犯豈意訟因小吏詞忤大臣蒼黃之際  
命歸不測傷哉以大厯三年七月十一日奄終於河

中府春秋卅有七夫人滎陽鄭氏芳蘭之姿堅冰之  
操中年不幸先公而亡以廣德元年十一月十四日  
返口於晉州官舍享年卅有一旋以公卽世之歲十  
一月廿六日合葬於晉城東徧龜筮叶從也嗣子季  
平弱而在疚哀不絕聲長號終天願言報德銘曰  
長材國楨雅望人傑植性剛毅守官忠烈闕心苦節  
汾晉作牧吏畏人悅如何生涯忽焉寘闕秀木折繁  
霜凝兮芳蘭歇于秋兮萬闕雙魂兮同穴續語堂  
碑錄

王延昌

全唐文四百三十五有傳



大唐興唐寺淨善和尚塔銘

和尚姓張氏法號淨善京兆雲陽人也幼而神清長益靈悟誠請既深緣愛自淨廼授經於惠雲溯源窮委靡弗徹貫以故業行高超利益弘溥知與不知宣示咸得解脫朗悟信大道之津梁也以乾元元年二月六日告行於興唐寺門人惠信等與俗侶白衣會葬近千人焉以其年九月九日起塔於畢原高岡式昭大口庶慰永懷銘曰

佛有妙法使皆清淨世界罕聞口然莫正大哉我師降厥慈悲開示寂樂破其惑迷法相既圓色空自離

千萬大眾歎泣而隨功成身去自契自藏銘於塔石

與天同長

石刻

鮑防

全唐文四百三十七有傳

停罷咸陽縣令賈全奏

准廣德二年敕中書門下及兩省官五品已上尚書省四品以上諸司正員三品已上官諸王駙馬等周親已上親及女婿外甥等自今已後不得任京兆府判司及畿縣令兩京縣丞簿尉等者今咸陽縣令賈全是臣親外甥恐須停罷

唐會要六十九



徐承嗣

全唐文四百三十八有傳

日蝕退分請編史册奏

歷數合蝕八分今退蝕三分計減強半準占君盛明則陰匿而潛退請宣示朝廷編諸史册

唐會要四十二

盧邁

全唐文四百三十八有傳

京兆河南兩府不勾縣案奏

伏詳比部所勾諸州不更勾諸縣唯京兆府河南府既勾府並勾縣伏以縣司文案既已申府府縣並勾

事恐重煩京兆府河南府請同諸州不勾縣案

唐會要五

九十

徐浩

全唐文四百四十有傳

謝賜書表

臣言伏奉詔書賜臣漢故南陽郡太守鄧恢素書一十五行奇跡遠至臣孤見寡聞所未遇臣當臨做冀日進益不任欣戴謹奉表以聞臣誠惶誠恐頓首死

罪寶真齋法書贊

于頔



全唐文四百四十三有傳

別置推事文例奏

諸處推事不盡須重勘覆或有誣告等每失程期稽滯既多寃濫難息諸司及諸館驛多以大理為閑司文牒遞報頗至稽滯失望今後各令別置文例切約所由稍涉稽遲許本寺差官累路勘覆如所稽遲處分州縣本判官請書下考諸司使本推官奪一季俸

唐會要料六十六

祀武成王議

國家據理經恢弘祀典法施于人則祀之故追尊仲

尼為文宣王貴德也以勞定國則祀之故追尊齊太公為武成王崇有功也臣伏以文宣王禮樂刑政之紀為君臣父子之節措置皇極化成人文齊日月之耿光合天地之明德其於禮物宜其優崇而武成王翼康匡周拯人靖亂功表東海道光一時推為武宗誠謂不朽請依李紆奏為之焉

大唐郊祀錄十

盧杞

杞字子良相德宗陰害矯譎李懷光反暴杞罪惡帝始寤貶新州司馬徙澧州別駕死按與全唐文四百



四十五盧杞別

置監考使奏

六典云中書舍人給事中充監中外考使重其事也  
今者有知考使無監考使既闕相臨難令詳揀請依  
舊置監使

唐會要  
五十五

黎幹

全唐文四百四十六有傳

李勉勾當京城諸街奏

京城諸街種植大厯二年五月勅諸坊市街曲有侵  
街打墻接簷造舍等先處分一切不許並令毀拆宜

委李勉常加勾當如有犯者科違勅罪兼須重罰其  
種樹栽植如聞並已滋茂亦委李勉勾當處置不得  
使有斫伐致令死損並諸橋道亦須勾當

唐會要  
八十六

董晉

全唐文四百四十六有傳

昭德王皇后祔廟奏

伏惟古禮合用今年七月卒哭祔廟國朝故事高祖  
六月而葬睿宗十月而葬並葬訖便卒哭祔廟聖朝  
典故伏請遵仍令所司於今月十八日已前擇卒哭  
位哭訖以十八日祔廟

唐會要  
卷三



公主出嫁行册禮奏

今月十日新都長公主出嫁行五禮準舊例並合前  
一日於光順門行五禮今奉勅其日早於光順門便  
行册禮遂為故事

唐會要  
卷六

册公主典故奏

今月八日正衙册新都長公主準開元禮其日皇帝  
御正衙命使行册禮陳樂懸伏準貞元二年五月册  
嘉誠公主二年二月册長林公主皇帝並不御正殿  
亦不設樂懸遂為典故

唐會要  
卷六

王紹

全唐文四百四十六有傳

權設幕屋為獻懿二祖行廟奏

奉遷獻祖懿祖神主附于德明興聖廟為修廟未成  
今月十五日內移獻祖主於德明興聖廟中一處安  
置九室數已定請於德明興聖廟東北量地之宜權  
設幕屋為行廟奉安神主俟新廟成準禮遷附神主  
入新廟每至禘祫年各於本室行享禮

唐會要  
卷十四

陳設四室權安神主奏

請於德明興聖廟添造兩室奉安神主今緣就舊廟  
增修則德明興聖廟殿南垣內陳設四室權安神主



庶爲宜稱同上

王涯

全唐文四百四十八有傳

均攤南鄭欠稅奏

興元府南鄭兩稅錢額素高每年徵科例多懸欠今請於管內四州均攤代納二千五百貫文配蓬州七百五十貫集州七百五十貫通州五百貫巴州五百貫唐會要八十四

桑叔文

叔文貞元時左衛率府騎曹參軍

唐故淮南節度討擊副使光祿大夫試殿中監

兼泗州長史上柱國北平縣開國伯田府君

墓誌銘 并序

公諱仇京兆府涇陽人也鍾鼎之族被于前史高祖宏皇光祿大夫靈冀等州刺史祖崇朝散大夫恒王府司馬父仁俊朝議大夫朔州刺史並公望驟歸德映臺閣冰壺表節水鏡居心公惟岳降神妙年獨秀才高捧日詞美朝天懷百勝之謀有七擒之略故淮南節度使工部尚書潁川陳公特達見許殊禮相遇屈公入幕補節度討擊副使累奏光祿大夫試殿中



監兼泗州長史上柱國北平縣開國伯且楚有子玉  
文公爲之側席漢有汲黯當朝爲之正色若非功高  
衛霍名比關張孰能有此榮貴方將匡讚台階剋隆  
元老何期智士石折賢人星殞積善無徵奄然辭位  
貞元三年七月七日告終于江都縣贊賢坊之私第  
春秋五十有一未得歸其柩榆且欲卜其宅兆卽以  
其年八月四日歸葬于江都縣山光寺南原之塋禮  
也公孝德純深風表墻仞舒卷風雲之際從容淮海  
之間挺生不群保此全德一朝休息平生已矣豪梁  
之上無復魚臺仲蔚之園空餘榛棘嗚呼哀哉乃爲

銘曰

森然秀氣鬱爾嘉猷彎弧月滿長劍星流肅肅轅門  
稜稜霜氣日耀金戈雲連鐵騎南陽菊散西鄂芝沉  
摧殘壯志埋沒雄心琴覆弦寬書埋簡落平陵松樹  
穎川石墀曠野蕭條悲風寂寞

石刻

李說

說官河東節度北都留守太原尹

進甘露表

臣說言臣所部太原府交城縣石壁山寺今月二十  
二日夜甘露降于寺內戒壇西及寺外栢林上大枝



小葉無不周偏凝泣垂滴甘甜如蜜當寺臨壇大德  
僧慎微與僧惠廣等一十五人咸共觀嘗覆問如狀

貞元十二年九月二十五日 顧氏金石  
文字記

裴同亮

同亮京兆人進士

唐故清河郡夫人張氏墓誌銘 并序

貞元十五年十一月十二日夫人張氏奄終兮長安  
縣懷德里之私第夫人張氏府君賈秀曾孫游擊利  
休之愛夫人宿丞令族天與其惠柔儀雪映志行松  
操至於織紉饗餼奠祀之禮厚情周物絲竹通妙皆

慕生知出為時則洎玉笄耀首至德全成求之美地  
嬪于張氏秦晉有正鳳凰其儀鏡鸞無而雙影臨栢  
舟泛而中河嬪爾乃服其浣濯鼓其琴瑟內閑外恭  
安親惠下宿窈之容有節螽斯之慶大耋黔婁之妻  
從夫孟軻之母訓子方俟同年也嗚呼積善無徵疾  
也有作山林倅色泉路何迷夫人春秋六十有己貞  
元十六年葬于□□□兒女四人孤幼鴈行泣血白  
鳥祥至風樹不停神道昭感天之明察海珍撫視摧  
勸惜奠奠之早落興言異室羗桂月之先扼哀悼痛  
傷骨肉持封石字永同天地之長海變桑田還識茶



墓誌銘

堂堂府君后族之良灼灼夫人宗室之光正若秦晉  
睦若潘陽琴瑟培培鳳凰鏘鏘宜爾偕老萬壽無疆  
如何昊穹今也則亡重泉幽壤無見日荒壟白揚生  
蕭飄石刻

史恒

恒貞元初邠州三水縣令

大唐故扶風郡夫人馮氏墓誌銘 并序

夫人門傳高族鍾鼎承家既笄之年配于君子即故  
通議大夫行內侍省內侍員外置同正員太原王公

庭瓌之夫人也公則厲節立身忠以奉主出承王命  
入侍禁闈累秩成勞頻遷祿位何期不壽逝我良臣  
以興元元年薨於私第夫人孀居苦節備禮從家婉  
順執心三隨婦道常依釋衆齋戒有時早悟空緣脩  
持真諦奈何積善無徵德昭禍及昔掩空堂梧桐半  
折今歸厚夜琴瑟兩亡嗚呼哀哉又足悲也貞元八  
年歲集壬申九月廿八日終於京大窰里之私第春  
秋五十有六即以其年冬十月廿七日合祔於長安  
縣龍首原送終禮也嗣子德進次子德逸次子德遜  
晏等孤女嬀于劉氏並號絕擗地毀骨傷神痛割於



心昊天何極恐陵谷海變託石銘云

太原王公厲節奉忠不圖早世禍降先薨郡君夫人

四德能恭生之秦晉死之穴同石刻

楊自政

自政貞元初大理評事

大唐南陽張公故太原郡太夫人王氏墓誌銘

并序

夫人先衰之太原曾祖文武不墜才藝餘美隱跡邱園父處泰之二女也夫人四德備身內和外睦敬上撫下愛之六姻一念真如脩持衆行三歸淨戒滅即

示生奈何積善無徵有染來疾日月已累厚夜長辭

貞元八年二月廿九日終於京長安縣義甯里之私

第春秋七十有五即以三月廿二日葬于城西龍首

原禮也嗣子奉天定難功臣雲麾將軍守左金吾衛

大將軍兼試太常卿上柱國開國伯右神策軍副將

專知苑內都巡安孤女笄于高氏並號叫辨地氣絕

無聲以託斯文刻之銘記詞曰

張公之室大原郡君名家遠族非晉卽秦前之與後

永閉雙春白揚悲風傷之見人續語堂碑錄

田益



益貞元中人

唐故泗州長史試殿中監京兆田府君墓誌銘

并序

府君諱侁京兆涇陽人也曾祖宏唐故光祿大夫驃騎大將軍靈冀等州刺史祖崇朝散大夫恒王府司馬父仁俊朝議大夫祥州刺史之次子也公豁達英才氣雄志勇少參戎武累著勲業至如攻必取戰必勝安危定難只在談笑則公之德歟世不絕賢尋拜泗州長史試殿中監又歷諸府幕權摠臧司則翰墨不能縷載夫人清河冀氏淮南節度押衙開府儀同

三司檢校太子賓客景城郡王奕之長女也皆軒冕盛族令德備聞輔佐君子實謂秦晉耳公久主強兵屢清淮海功高望重日冀遷榮所謂公祿及二千石壽逾百歲奈何上天不仁屈公以短曆哀哉貞元三年七月七日寢疾歿于揚州江都縣贊賢坊之私第也享年五十其時道路艱阻未獲還鄉權卜葬于揚州江都縣臨灣坊之原也積善無慶夫人小因沉痾於貞元十一年六月廿五日又終舊室嗚呼漂然寄家親故乖遠數歲之內淪謝相望夫人作腹不孕府又無別息以姪孫益繼副其後益罄其餘產奉舉大



事以其年八月廿七日合祔於府君舊塋禮也慮恐  
歲月遷邁陵谷變移所銘貞石期於不朽辭曰  
功成業就兮身之云亡事不可問兮悠悠彼蒼駿馬  
錦衣兮淪形滅影寶劍金甲兮沉氣銷光孤墳峨峨  
兮倚雲臨水新栢蕭蕭滴露凝霜親友哭送兮從茲  
一別永無返期兮泉路何長石刻  
任要  
要官都督兖州諸軍事  
岱嶽觀題名  
貞元十四年正月十一日立春祭嶽遂登太平頂宿

其年十二月廿一日立春再來致祭茶宴于茲顧氏金石文字記

趙傳說

傳說建中時人

資陽縣法雨寺北巖釋迦牟尼佛龕頌 并序

龕者以文字之義則合加於龍龍之德大矣哉上古  
以之伏藏焉所謂石室也後代勒之以佛像傳寶迹  
於遠也□□窮於□劫剛石偏於沙界用包大空□  
入羣有光明□□清淨龍飛善救缺四字慈愍然龕者  
乃此居士姓左名巖字太素其先出於齊國五代祖



因□派流今為資中人也爰宅我居惟桑與梓幼而  
貞敏長而能賢家室諧和孝友恭儉五十餘年人莫  
知也故能靖迴脩習體魄精凝不□□□寶生□室  
戒全字缺四膏所留處而俗化不規字缺四是片□奇匠  
歆靈岑錐未及字缺四作鑿不見鋒火即□炤□□□  
之□而□之寶貝□□於絕壁字缺四於峭嶠螺髻雲  
結額字缺五北峯比崇日將南江長注現輪王之□好  
觀諸虛空而此身字缺四世界而彼佛□來徒以寒暑  
之不居閱□窮之久代以天地之長久悲永劫之因  
緣乃為頌曰

離靈峯兮亘□□湛明鏡兮大龍□□□寶□兮日  
月輝若有人兮知四諦觀佛性兮□□際見光□兮

千□□金石苑

侯鉛

銘德宗朝人

大唐故昭武校尉守左驍衛將軍上柱國陳公

墓版序文并序

公諱義字興厥初以大舜之稟侯于陳而氏焉敬仲  
已還不常其所今又為河東人也王父克同列考福  
皆讀叔夜養生之論慕蔣詡斂迹之風滄素自高疎



于榮祿公屬天寶季祀羯胡干紀激仁爲勇移孝作  
忠徇定遠之從義期征虜以効節頃之官至左驍衛  
將軍策上柱國累有功也尋入居環衛載睦親朋方  
趣無生以得真先依有相而弘法割田園之產罄俸  
祿之資齋筵列於皇州僧徒畢至香翰寫於玄籍唐  
本無遺允矣知身是幻而況於財不亦達乎將福庶  
類而况祖考不亦仁乎春秋七十有二願終邁疾永  
貞元年十月六日卒于上都金城里之私第於戲嗣  
子叔寧年齒尙幼夫人河南正氏夙有淑德嚴于壺  
範公之善功皆夫人佐成逮今茹荼飲泣于芑事

以其年冬十二月二十有五日庚申葬于長安縣龍  
首原禮也銘曰

尙忠好仁載經籍公實兼之成懿績作善精魂當有  
適順時松楸斯纂纂

石刻

樊晃

晃德宗朝潤州刺史歷度支兵部員外湖陽人

杜工部小集序

工部員外郎杜甫字子美膳部員外郎審言之孫至  
德初拜左拾遺直諫忤旨左轉薄遊隴蜀殆十年矣  
黃門侍郎嚴武總戎全蜀君爲幕賓白首爲郎待之



客禮屬契濶湮阨東歸江陵緣湘沅而不返痛矣夫  
文集六十卷行于江漢之南常蓄東游之志竟不就  
屬時方用武斯文將墜故不為東人之所知江左詞  
人所傳誦者皆君之戲題劇論耳曾不知君有大雅  
之作當今一人而已今採其遺文凡二百九十篇各  
以志類分爲六卷且行於江左君有宗文宗武近知  
所在漂寓江陵冀求其正集續當論次云

杜工部集

### 李藩

藩字叔翰少沈靖敏于學杜亞守東都表致府中張  
建封辟節度府官建封卒詔追入釋拜秘書郎擢吏

部郎中拜門下侍郎同平章事出爲華州刺史未行  
卒贈戶部尚書諡貞簡

### 趙郡李氏殤女墓石記

殤女李氏趙郡高邑人也小字孫二年十六貞元十  
七年十一月廿二日邁疾終於長安永寧里之旅舍  
以十二月三日窆於萬年縣高平鄉西焦村之南原  
從權禮也曾祖父諱畬皇國子司業贈太子賓客祖  
諱承皇正議大夫檢校工部尚書兼潭州刺史贈吏  
部尚書諡曰懿子歷淮西道淮南道黜陟使河中道  
山南東道湖南道節度觀察都防禦都團練等使父



藩秘書省秘書郎殤即藩之第三女也念爾稟天之  
 和而聰明孝友得禮之節而恭敬廉讓奉上順下動  
 無所違吾身苦病爾之疾畏吾之知吾家苦貧爾之  
 欲亦畏吾之知淳性感人逮此增痛痛莫及矣哀如  
 之何唯俟於吉時歸葬于故國祔我先坐之松栢從  
 爾孝思而已矣銜涕書此用安幽魂魂而有知鑒我  
 誠意貞元十七年十二月三日秘書省秘書郎李藩  
 記石

宋并

并興元中人

魏博將校勒功銘

唐興元元年歲在甲子冬十有二月戊辰朔賊臣李  
 希烈據江漢之陽跨淮汴之右竊□神器陰包禍謀  
 為蛇為豕薦食郊□難雜中夏禍□服帝命東□  
 □伐叛時永平鼓行而衝其前昭義悉甲而倚其  
 左平盧張翼而角其右我尚書田公以北鄙多虞專  
 征楚□乃遣節度押衙後率兵馬使□符恍為行營  
 統軍以精卒萬騎仗律以躡其後以其月七日甲戌  
 次于孟津遂屯于大伾之下漢營□岸而月□虜帳  
 連山而星列乃維舟為梁截流□度數日之後方□



濟銳氣集雲合九天雄俊傍  
霜肅萬里元惡莽行  
爰刊茲山厥事

楊暄

暄貞元中宏農人按黃本驥謂卽天寶宰相國忠猶子非

大唐故清河張夫人墓誌銘

并序

夫人號威德清河之族積善承家祖考諱延昌二女  
不乏世賢園林隱跡夫人既笄之後嬀于閻氏婉  
順和睦克柔母儀淑慎於家聲聞於里况乎先覺早  
悟色空齋戒在心持念閑目奈何善不增壽命也自

來染疾月旬歲過不減貞元八年二月廿日終於京  
長安縣義宜里之私第春秋六十有九卽以其年五  
月十八日擇兆吉辰葬於長安城西龍首原之禮也  
嗣子庭萼右龍武軍宿衛忠孝之道號絕過禮次子  
庭珍右羽林軍宿衛邠州節度使尙書張獻甫奏赴  
行營遂忠於國孝不並行報哀之情昊天何極嗚呼  
痛哉又足悲也一女四德嬀于白氏半子之分禮以  
恭仁攀慕痛深將刻斯石其銘曰

清河夫人嬀于閻氏二男一女忠孝誰理  
守痛絕靈机四時定省賴之半子

其楚挽送終染疾



一周死生命也念之何求其三孤墳寂寂松柏颼颼泉

門永掩萬古千秋其四古誌石華

公父孤悲也... 孤墳寂寂松柏颼颼泉... 門永掩萬古千秋... 古誌石華



